

四庫全書

史部

欽定四庫全書

東都事略卷二

宋王稱撰

本紀二

建隆元年春正月乙巳詔改元大赦天下國號大宋已酉命官分告天地社稷遣中使乘傳齎詔諭天下丁巳祀周廟因詔有司以時朝拜祭享令有司議立宗廟已巳議立四廟鎮州言太原契丹軍皆遁二月乙亥尊帝母南陽郡太夫人杜氏曰皇太后以周宰相范質兼侍

中王溥魏仁浦仍同中書門下平章事樞密使吳廷祚
同中書門下二品己卯以吳越國王錢俶爲天下兵馬
大元帥三月壬戌有司上皇高祖文安府君諡曰文獻
皇帝廟號僖祖皇高祖妣崔氏諡曰文懿皇后陵曰欽
陵皇曾祖中丞府君諡曰惠元皇帝廟號順祖皇曾祖
妣桑氏諡曰惠明皇后陵曰康陵皇祖驍衛府君諡曰
簡恭皇帝廟號翼祖皇祖妣京兆郡夫人劉氏諡曰簡
穆皇后陵曰定陵皇考武清府君諡曰昭武皇帝廟號

宣祖陵曰安陵有司言國家受周禪周木德木生火當以火德王色尚赤臘用戌夏四月昭義軍節度使李筠叛命石守信高懷德率師討之五月己亥朔日有食之癸卯石守信敗李筠於長平丙午周六廟成丁巳詔親征削奪李筠官爵吳廷祚爲東京留守皇弟爲大內都點檢己未發京師甲子石守信高懷德破李筠三萬衆于澤州南六月辛巳皇帝命衛士攻拔澤州李筠伏誅乙酉北伐潞州丁亥筠子守節降澤潞平辛卯赦天下

丁酉班師秋七月戊申皇帝至自澤潞八月戊辰朔入
閤甲申立琅邪郡夫人王氏爲皇后趙普樞密副使九
月丙午冊四親廟戊申荆南高保融卒淮南節度使李
重進叛命王審琦李處耘宋廷渥率師討之削奪李重
進官爵冬十月丁亥詔親征皇弟爲大內都點檢吳廷
祚爲東京留守庚寅發京師丁未次揚州即日拔其城
李重進伏誅揚州平十二月己巳班師丁亥皇帝至自
揚州泉州留從效稱藩

二年春浚五丈河上曰河渠之役蓋非獲已煩民奉已之事朕不爲也夏四月癸巳朔日有食之庚申寬鹽麴法五月癸亥朔赦天下六月甲午皇太后杜氏崩秋七月壬申以皇弟爲開封尹同平章事八月庚子江南國主李景卒冬十月丙午明憲皇后祔葬安陵

三年春正月甲戌詔曰民生在勤所寶惟穀先王之明訓也朕奄宅中夏爲之司牧矇乃億兆期臻富庶矧農桑之業爲衣食之原今陽和在辰土膏脉起當播種之

云始慮游墮之尚多苟力作之不勤則秋斂之何望諸
州長吏等任居牧守職司勸課所宜敦率黎庶勉厲農
功俾比屋之人服勞於南畝三時之務無失於西成極
其蘆藁之勤用致茨梁之詠懋功信賞國典在焉二月
甲午詔常參官每五日以次轉對三月丁亥詔曰王者
設棺槨之品建封樹之制所以厚人倫而一風化也近
代以來遵用夷法率多火葬甚愆典禮自今宜禁之乙
巳追冊故會稽郡夫人賀氏爲皇后夏五月大修宮闕

六月癸巳吳廷祚罷冬十月辛丑趙普樞密使李處耘
樞密副使朗州周行逢卒十一月癸亥詔曰古稱使於
四方不辱君命可謂士矣自今使諸道敢有求託者寔
其罪荆南高保勗卒十二月衡州張文表叛攻潭州周
保權使來乞師是歲周鄭王出居于房州

乾德元年春正月庚申慕容延釗李處耘率師討張文
表二月獲張文表癸巳克潭州荆南高繼沖歸朝得州
三縣十七三月克岳州戊寅克朗州慕容延釗盡平湖

南之地得州十四監一縣六十六夏四月甲申曲赦荆湖復增修宮闕凡規爲制度並上指授旣成坐寢殿中令洞開諸門皆端直通豁謂左右曰此如我心小有斜曲人皆見之秋九月羣臣上尊號曰應天廣運仁聖文武皇帝丁卯李處耘貶冬十一月癸亥親享太廟甲子合祭天地于圜丘以宣祖配大赦天下改元十二月甲申皇后王氏崩閏月辛未改卜安陵

二年春正月辛巳詔曰箕子之陳八政食爲之首夷吾

之述四民農居其一今土膏將起勾萌畢達平秩東作
乃其時也諸州長吏等所宜敦率勸課俾民力耕謹視
游墮勿令廢業厚生務本副予意焉大雨雪震電戊子
范質王溥魏仁浦罷趙普同中書門下平章事李崇矩
樞密使壬辰詔曰先代置賢良方正能直言極諫經學
優深可爲師法詳閑吏理達於教化三科自今不限內
外職官前資見任黃衣布衣並許詣闕進狀朕當親試
焉己亥王仁瞻樞密副使二月浚閔河夏四月乙卯葬

宣祖皇帝昭憲皇后于安陵孝明孝惠二后祔乙丑薛
居正呂餘慶並參知政事秋七月辛卯令翰林學士承
旨陶穀等四十三人各舉任藩鎮通判者各一人冬十
月甲戌詔以王全斌崔彥進王仁贍劉光毅曹彬分路
伐蜀十二月王全斌克興州與蜀軍戰于三泉敗之

三年春正月劉光毅克夔州王全斌克利州己丑克劍
州劉光毅克萬施開忠四州乘勝至遂州甲午王全斌
之師至魏城蜀主孟昶降丙午赦蜀得州四十六縣二

百四十二月癸卯命呂餘慶知成都府王全斌殺蜀降
兵二萬人於是兩川盜賊羣起詔所在討之夏五月孟
昶至京師戊子赦天下六月甲辰以孟昶爲中書令封
秦國公庚戌昶卒冬十一月契丹侵易州

四年秋七月甲寅詔曰豐年之詠播于頌聲廣蓄之訓
垂於載籍今三時不害百姓小康田里無愁歎之聲隴
畝有遺滯之穗州縣長吏等職司牧養義當勸率俾及
歲穰各務儲積或值凶歉不至匱乏古者倉廩實禮節

興所宜禁民捕博勿致游墮戒其崇儉免於靡穀申嚴
條教稱朕意焉王全斌克雅州詔曰五代以來兵亂相
繼國用不足庸調繁興朕厯試艱難周知疾苦省嗇用
度未嘗加賦優卹灾沴率從蠲復所在長吏明加告諭
自今百姓有能廣植桑棗墾闢荒田者只輸舊租禁將
帥取軍中精卒爲牙兵冬十一月癸丑寬鹽禁

五年春正月辛丑王全斌崔彥進王仁贍並以在蜀貪
殘殺戮貶二月壬戌沈倫樞密副使夏六月戊午朔日

有食之秋七月己巳詔曰自夏以來水旱爲沴深慮民
庶至於流離宜令諸州長吏告民無轉徙被災民蠲其
賦

開寶元年春二月立皇后宋氏夏六月癸亥詔曰人倫
以孝慈爲先家道以敦睦爲美矧犬馬而有養豈父子
之異居傷敗風化莫此爲甚應百姓祖父母父母在者
子孫無得別籍異財長吏其中戒之秋七月太原劉承
鈞死八月戊辰羣臣上尊號曰應天廣運聖文神武明

道至德仁孝皇帝九月太原劉繼恩爲其臣侯霸榮所弑冬十月以諸鎮節度爲環衛十一月癸卯合祭天地于圜丘大赦天下改元

二年春正月戊午詔親征太原己未皇弟留守京師甲子發京師乙亥駐蹕潞州三月戊戌皇帝至太原決晉祠水灌城夏四月壬子何繼筠敗契丹于陽曲五月甲申壅汾水灌太原城閏月戊申太原南城陷水注城中劉繼元殺其宰相郭無爲壬戌皇帝以暑雨班師六月

癸巳皇帝至自太原秋九月大霖雨冬十月丁亥詔曰
昔西漢求吏民之明經術者令與計偕縣次續食蓋優
賢之道也國家歲開貢部敷求俊乂四方之士無遠弗
届而經途遐阻資用或闕朕甚愍焉自今西川山南荆
湖等道舉人往來給券

三年春正月辛酉詔諸道州府察民有孝悌彰聞德行
純茂擅鄉曲之譽爲士庶推服者以聞夏四月辛未朔
日有食之庚子除河北鹽禁秋七月壬子詔曰吏負宀

多而求其治者斯難也奉祿鮮薄而責以廉者無謂也
與其冗貲而重費不若省官而益奉諸道州縣官宜以
戶口爲率差減其貲舊奉外月增給五千九月己亥命
潘美尹崇珂伐嶺南壬子潘美克富州冬十月潘美克
賀州十一月克昭桂二州十二月庚午克連州戊子克
韶州

四年春正月潘美克英雄二州二月丁亥克廣州擒劉
鋹廣南平得州六十縣二百十四辛卯赦廣南三月乙

已詔曰百越之人久淪虐政其令嶺南諸州長吏察僞政有害於民者以聞當悉除之夏五月乙未皇帝御明德門受俘釋銀罪以爲右千牛衛大將軍封恩赦侯冬十月癸亥朔日有食之丙戌詔嶺南諸州劉銀日煩苛賦斂並除之平民爲兵者招誘復業十一月癸未合祭天地于圜丘始用綉衣鹵簿大赦天下

五年春正月壬辰大雨雪禁民以鐵鑄佛像及浮圖二月庚寅劉熙古參知政事夏五月壬戌廢嶺南媚川都

禁民採珠是月霖雨放後宮五十餘人秋九月丁巳朔日有食之癸酉李崇矩罷

六年春二月周鄭王殂夏六月庚申劉熙古致仕秋八月甲辰趙普罷九月丁卯呂餘慶罷己巳皇弟封晉王薛居正沈倫並同中書門下平章事盧多遜參知政事楚昭輔樞密副使壬申詔晉王位宰相上冬十月甲申葬周恭帝于順陵

七年春二月庚辰朔日有食之丙子日中有二黑子秋

九月遣李穆使于江南召李煜入朝煜辭以疾命曹彬
潘美征之冬十月克池州曹彬頓兵于采石磯十一月
曹彬等用浮梁以濟師契丹來求通好

八年夏四月庚午吳越國王錢俶克常州五月壬申錢
俶加太師詔曰嶺表之俗疾不呼醫自皇化攸及始知
方藥商人齋生藥度嶺者勿筭秋七月辛未朔日有食
之甲申詔錢俶歸國九月克潤州冬十月己亥李煜遣
其臣徐鉉周惟簡來乞緩師壬寅遣歸其國命修西京

宮闕十二月己亥曹彬克昇州擒李煜江南平得州十
九軍三縣一百八江南旣平捷奏至上因泣下謂左右
曰宇縣分割民受其弊思布聲教以撫養之攻城之際
必有橫遭鋒刃此實何罪因讀尚書嘆曰堯舜之世四
凶之罪止從投竄何近代法網之密邪辛丑赦江南
九年春正月戊辰朔皇帝御明德門受俘以李煜爲右
千牛衛上將軍封違命侯庚辰詔以後月幸西京有事
于南郊二月癸卯羣臣上尊號曰應天廣運一統太平

聖文神武明道至德仁孝皇帝上以燕晉未平不許羣
臣復以立極居尊爲號乃許庚戌曹彬樞密使已未吳
越國王錢俶來朝三月詔俶歸國壬申享太廟丙子發
京師庚辰謁安陵賜河南府民今年田租之半復奉陵
戶一年辛巳皇帝至西京夏四月庚子合祭天地于南
郊大赦天下都民垂白者相謂曰我輩少經亂離不圖
今日復覩太平天子有泣下者辛亥皇帝至自西京曹
翰克江州秋八月丙辰分兵五路以討太原有神降于

岐冬十月癸丑皇帝崩於萬歲殿聖壽五十殯于殿之西階羣臣上尊謚曰英武聖文神德皇帝廟號太祖明年四月乙卯葬永昌陵大中祥符元年加上尊謚曰啓運立極英武聖文神德立功大孝皇帝五年再加上尊謚曰啓運立極英武睿文神德聖功至明大孝皇帝臣稱曰烏虜自三代以上莫不得天下以正也堯舜傳之賢而禹傳之子湯武雖以仁易暴而湯有慙德孔子謂武未盡善則是湯武尚處聖人之不幸也太祖皇帝

聰明齊聖由揖遜而有天下如堯與舜至於天祿之傳
不歸之子而歸之弟則賢於禹遠矣況湯武乎烏虐得
天下以仁棄天下如脫屣數千百載之間繼堯舜之正
者唯太祖爲不可及也已

東都事略卷二

欽定四庫全書

東都事略卷三

宋王稱撰

本紀三

太宗至仁應道神功聖德文武睿烈大明廣孝皇帝宣
祖第三子也母曰昭憲皇后后夢神人捧日寘于懷遂
有娠以晉天福四年十月甲辰生於開封府浚儀縣崇
德北坊官舍赤光滿室幼穎悟好讀書宣祖爲將征淮
上克州縣諸將皆爭子女玉帛宣祖爲訪其書籍歸以

遺太宗謂之曰文武立身之本汝其勉之及長隆準龍
顏望之儼然周顯德初補右班殿直遷供奉官五年改
殿前祇候供奉官都知太原劉承鈞結契丹侵邊命太
祖北伐太宗從行至陳橋爲六軍推戴太祖受周禪以
太宗爲殿前都虞候領睦州防禦使太祖征澤潞留爲
大內都點檢領泰寧軍節度使太祖征李重進又爲大
內都點檢二年爲開封尹同平章事乾德二年拜中書
令開寶初太祖征太原以爲京師留守六年封晉王有

詔班宰相上九年十月癸丑太祖崩奉遺詔即皇帝位
大赦天下庚申以皇弟廷美爲開封尹封齊王太祖子
德昭始封武功郡王盧多遜同中書門下平章事楚昭
輔樞密使十一月甲子追冊故尹氏及越國夫人苻氏
爲皇后丁卯詔曰帝堯之化實先於敦族成周之制爰
後於異姓自今朝會齊王廷美武功郡王德昭位宜在
宰相上

太平興國元年冬十二月甲寅大赦天下改元

二年春二月庚子皇帝更名夏四月乙卯葬英武聖文
神德皇帝于永昌陵秋八月作崇聖殿冬十一月丁亥
朔日有食之既

三年春三月己酉吳越國王錢俶來朝夏四月己卯陳
洪進以漳泉兩州歸于有司得縣十四五月乙酉赦漳
泉吳越國王錢俶以國歸于有司得州十三軍一縣八
十六丁亥徙封錢俶爲淮海國王戊子赦兩浙秋七月
乙酉大雨震電八月黃河清甲戌羣臣上尊號曰應運

統天聖神文武皇帝冬十一月丙申合祭天地于圜丘
大赦天下

四年春正月庚寅以潘美伐太原石熙載僉書樞密院
事二月辛亥詔幸鎮州丙辰沈倫爲東京留守甲子發
京師三月乙未郭進大破契丹于石嶺關夏四月庚戌
石熙載樞密副使壬戌皇帝幸太原折御卿克奇嵐軍
乙丑克隆州己巳克嵐州辛未皇帝幸太原城以手詔
諭劉繼元五月壬午幸城南癸未劉繼元降釋其罪太

原平得州十軍一縣四十一乙酉赦太原己丑以劉繼
元爲右衛上將軍封彭城郡公丁酉隳隆州六月庚申
北征庚午次幽州秋七月甲申班師乙巳皇帝至自范
陽八月甲戌武功郡王德昭薨冬十月乙亥皇弟廷美
進封秦王

五年秋七月丁未討交州冬十一月丙午以秦王廷美
爲東京留守己酉詔幸北邊壬子發京師戊午駐蹕于
大名十二月乙酉皇帝至自大名

六年春三月己酉太祖子德芳薨交州行營大破賊軍于白藤江口夏六月甲戌薛居正薨秋九月乙未朔日有食之辛亥趙普爲司徒兼侍中石熙載樞密使秦王廷美乞班趙普下從之壬子詔曰古者振木鐸于路所以來四方之風謠設獸樽于庭所以延羣臣之諫諍在朝內外官自今或知民間利病及時政得失並得直言無隱冬十月癸酉羣臣上尊號曰應運統天睿文英武大聖至德廣孝皇帝十一月癸亥合祭天地于圜丘大

赦天下癸丑楚昭輔罷

七年春三月癸巳朔日有食之乙巳以皇弟廷美爲西京留守交州遣使來謝罪唐州蝗夏四月甲子竇偁郭贇並參知政事柴禹錫樞密副使盧多遜罷乙丑皇弟廷美勒歸第盧多遜流崖州庚辰沈倫貶五月己酉夏州李繼捧來朝以其地來獻得州四縣八繼捧之弟繼遷叛丙辰皇弟廷美降封涪陵公房州安置秋七月甲午皇子德崇封衛王德明廣平郡王冬十月己卯竇偁

薨十二月戊午朔日有食之丙午赦銀夏等州令諸州置農師

八年春正月戊寅曹彬罷己卯王顯弭德超並樞密副使癸未詔曰養老乞言哲王之丕訓觀民設教載籍之大猷故適人振鐸以采詩刺史褰帷而按部所以參考風俗周知其淑慝延訪耆艾詳求於利病斯爲茂典可舉而行宜令州縣長吏或部內有耆德高年爲鄉里所信者並須延問民間疾苦吏治得失退而行之以稱吾

意甲申詔曰傳云能以禮讓爲國乎何有宜令開封府及諸州於衝要處設榜刻儀制令論如律二月戊子朔日有食之三月庚申宋琪參知政事甲申除福建諸州鹽禁夏四月壬子弭德超流瓊州六月己亥王顯樞密使秋七月辛未郭贄罷庚辰李昉參知政事八月庚戌石熙載罷冬十月己酉趙普罷皇子元佐封楚王元佑陳王皇第三子封韓王元俊冀王元傑益王十一月壬子宋琪李昉並同中書門下平章事甲寅令宰相班諸

王上壬申李穆呂蒙正李至並參知政事張齊賢王沔並同僉書樞密院事

雍熙元年春正月壬戌求遺書於天下乙丑涪陵公廷美卒癸酉李穆薨夏四月甲午詔以今年十一月有事于泰山五月廢諸州農師丁丑乾元文明殿災六月丁亥詔求直言上謂近臣曰朕訪求讜議以規己失昔禹拜昌言世稱其明今之諫者苟能中時病朕豈惜夏禹之拜乎壬寅詔罷封泰山以冬至有事於南郊秋八月

丁酉親祠太一宮冬十一月丁卯合祭天地于圜丘大赦天下改元十二月庚辰錢俶改封漢南國王壬辰德妃李氏立爲皇后

二年秋九月庚戌楚王宮火辛亥楚王元佐廢閏月乙未詔曰嶺南之俗民嫁娶喪葬衣服制度委所在長吏漸加戒厲俾遵條式其殺人祭鬼病不求醫僧置妻孥深宜化導使之悛革冬十二月庚子朔日有食之丙辰宋琪柴禹錫罷

三年春正月庚寅命曹彬崔彥進米信田重進潘美北伐契丹戊戌李至罷三月曹彬克契丹固安城田重進破契丹于飛狐北潘美自西陲與契丹遇追至靈州克之辛巳曹彬克涿州潘美取朔州又取應州田重進圍靈丘夏四月潘美克雲州五月曹彬等與契丹戰于歧溝關我師敗績潘美還代州徙雲應寰朔四州之民分置河東及京西計口給田免其租役六月戊戌朔日有食之辛仲甫參知政事秋八月丁酉王沔張宏並樞密

副使雲州觀察使楊業與敵戰死之冬十二月王師敗績于君子館

四年春二月丙申錢俶封南陽國王甲寅錢俶改封許王夏四月癸巳張宏罷趙昌言樞密副使冬十一月庚辰詔曰王者設班爵以馭貴差祿秩以養賢所以責之廉隅懋其官業也奉給之數宜從優厚應百官奉錢給佗物以八分爲十者自今給其實數

端拱元年春正月戊辰黃河清乙亥親耕籍田始三推

上曰朕志在勤農恨不得終於千畝豈止以三推爲限
哉遂耕數十步大赦天下改元二月丙申李昉罷趙普
爲太保兼侍中呂蒙正同中書門下平章事皇子元僖
封許王皇第三子封襄王元份越王錢俶徙封鄧王王
沔參知政事張宏樞密副使楊守一僉書樞密院事庚
戌皇子元偓封徐國公元偁涇國公三月乙丑趙昌言
貶乙亥誅侯莫陳利用于商州秋八月甲子鄧王錢俶
薨九月乙酉楊守一卒

二年秋七月己卯張齊賢樞密副使張遜僉書樞密院
事戊子彗出東井八月丙辰大赦天下冬十二月庚申
詔曰古先哲王託居人上蓋務求於至治豈有尚於虛
名矧乃皇帝之稱已極崇大爰自唐室始加美號徇臣
子之愛戴著方策之典常踵事增華積習無改朕博考
載籍追法古道既異三五之舊制深懼賓賓之有踰懼
然自思不遑寧處自今四方所上表宜祇稱皇帝上又
謂宰相曰皇帝二字亦不可兼蓋起於秦始皇後代因

之不改朕比欲止稱王但以諸子封王爲不便耳羣臣
上表請復尊號上不許又上法天崇道文武皇帝詔去
文武二字乃許

淳化元年春正月戊寅朔改元戊子趙普罷秋八月己
巳禁川峽嶺南採材

二年春閏二月辛未日有食之三月乙丑辛仲甫罷夏
四月辛巳張齊賢陳恕並參知政事張遜溫仲舒寇準
並樞密副使張宏罷秋七月李繼遷歸順九月丁酉王

沔陳恕罷己亥呂蒙正罷李昉張齊賢並同中書門下
平章事賈黃中李沆並參知政事癸卯王顯罷甲辰張
遜知樞密院事溫仲舒寇準同知院事

三年春正月乙巳詔曰昔舜之有天下也選於衆而舉
善人則不仁不善者斯遠矣矧今提封至廣設官尤衆
銓選既限於常調英俊或沉於下僚俾振滯淹屬在倫
類傳不云乎如有所譽者其有所試矣朕當親覽而進
之其令常參官舉升朝官者各二人二月乙丑朔日有

食之夏五月旱秋七月己酉太師趙普薨冬十一月己亥開封尹許王元僖薨

四年春正月辛卯合祭天地於圜丘以宣祖太祖並配大赦天下二月己未朔日有食之盜起于蜀夏六月丙寅張齊賢罷壬申張遜寇準罷柴禹錫知樞密院事呂端參知政事劉昌言同知樞密院事秋八月丙辰朔日有食之冬十一月辛未李昉賈黃中李沆溫仲舒並罷呂蒙正同中書門下平章事趙鎔向敏中同知樞密院

事蘇易簡參知政事丁丑趙昌言參知政事十二月賊推李順爲首陷蜀州又陷邛州又陷永康軍

五年春正月李順陷漢州又陷彭州癸酉命李繼隆討李繼遷甲戌命內侍王繼恩率兵討李順二月李順陷成都府夏四月李繼隆克夏州擒趙保忠以獻詔釋之授右千牛衛上將軍封宥罪侯壬寅王師克劍州五月克閬州又克巴州師進破賊十萬遂克成都李順之黨並伏誅秋八月蜀寇平九月壬申皇第三子爲開封尹

封壽王大赦天下上謂壽王曰政教在得人心而不擾
之得人心莫若示之以誠信不擾之無如鎮之以清淨
推是而行雖虎兇亦當馴狎況於人乎書曰撫我則后
虐我則讎信哉斯言也爾宜戒之乙亥寇準參知政事
丁丑詔曰朕惟蜀川文翁之化在焉乃者盜興畎畝連
陷州城靜言思之非民之咎蓋由朕委任非當燭理不
明親民之官失於綏養筦權之吏恣其誅求致然也念
茲失德是務責躬永鑒前非庶無貳過咨爾民庶當體

朕懷是歲大有年

至道元年春正月戊申朔改元丙辰上清宮成上曰朕在藩邸以先帝所賜營是宮欲以祈福而庇民也癸亥趙昌言罷戊辰錢若水同知樞密院事劉昌言罷三月庚申詔曰國家郡縣至廣吏負衆多自公卿以至卑品逮千萬數皆懷材抱器明習利病非開言路曷導下情宜令幕職州縣等官並許言公私利害附傳置以聞夏四月癸未呂蒙正罷呂端同中書門下平章事蘇易簡

柴禹錫罷張洎參知政事甲申趙鎔知樞密院事甲辰
開寶皇后宋氏崩秋八月壬辰詔以皇第三子開封尹
壽王爲皇太子大赦天下改元

二年春正月辛亥合祭天地于圜丘大赦天下二月庚
辰李昌齡參知政事秋七月丙寅寇準罷

三年春正月丙子溫仲舒王化基並參知政事李惟清
同知樞密院事張洎罷乙酉葬孝章皇后于昌陵之北
二月靈州行營大破李繼遷繼遷遁辛丑皇帝不豫三

月癸巳皇帝崩于萬歲殿聖壽五十九殯于殿之西階
羣臣上尊謚曰神功聖德文武皇帝廟號太宗十月己
酉葬永熙陵大中祥符元年加上尊謚曰至仁應運神
功聖德文武大明廣孝皇帝五年再加上尊謚曰至仁
應運神功聖德文武睿烈大明廣孝皇帝

臣稱曰太宗以英睿之姿佐太祖定天下開子孫帝王
萬世之業故太祖勤勤於傳襲非特以昭憲顧命而已
太宗以明繼聖而能廣文之聲卒其成功乃大一統于

時北自常碣南極嶺表東際海岱西接洮隴宋之威德
斯爲盛矣

東都事略卷三

欽定四庫全書

東都事略卷四

宋王稱撰

本紀四

真宗膺符稽古成功讓德文明武定章聖元孝皇帝太宗第三子也母曰元德皇后李氏以開寶元年十二月生于開封第赤光照室幼而聰睿姿表奇異與諸王戲好作戰陳之狀自稱元帥太祖愛之謂之曰汝爲天子否對曰由天命耳太平興國八年拜同中書門下平章

事封韓王端拱元年加侍中荆南淮南節度使封襄王
淳化五年爲開封尹進封壽王至道元年八月立爲皇
太子仍判府事三年三月癸巳太宗崩奉遺制卽皇帝
位于匱前夏四月乙未尊皇后曰皇太后大赦天下皇
弟元份封雍王元傑充王元偓彭城郡王元偁安定郡
王元儼曹國公李至李沆並參知政事五月丁卯詔求
直言極諫甲戌李昌齡貶丁亥立秦國夫人郭氏爲皇
后六月戊戌皇叔廷美追復秦王辛丑詔天下勿得以

祥瑞來獻甲辰皇兄元佐復封楚王乙巳追冊莒國夫人潘氏爲皇后錢若水罷秋八月己亥曹彬樞密使兼侍中趙鎔罷向敏中夏侯嶠並樞密副使李惟清罷冬十月乙酉葬神功聖德文武皇帝于永熙陵十二月丙申追尊帝母賢妃李氏爲皇后

咸平元年春正月辛酉朔改元甲申有彗出營室北二月甲午詔曰昔之哲王樂聞已過博延讜論庸致時雍矧予冲人始嗣基業政化猶鬱星變遽彰敢忘責躬以

荅垂譴其令有位極言無隱夏五月戊午朔日有食之
冬十月丙戌朔日有食之戊子呂端罷張齊賢李沆並
同中書門下平章事李至罷己丑溫仲舒夏侯嶠罷向
敏中參知政事楊礪宋湜並樞密副使

二年春閏三月庚寅詔開言路夏六月詔曰服用之制
條式具存儻奢僭不懲則耗蠹茲甚自今臣庶有鋪金
泥玉之飾其禁之戊午曹彬薨己丑王顯樞密使秋八
月乙卯羣臣上尊號曰崇文廣武聖明仁孝皇帝癸酉

楊礪薨九月庚辰朔日有食之冬十一月丙戌合祭天
地于圜丘奉太祖太宗並配大赦天下契丹侵邊乙未
詔幸河北己酉李沆留守京師十二月甲寅發京師戊
午駐蹕澶州甲子次大名契丹侵威虜軍王師破契丹
于五合川

三年春正月己卯朔益州軍亂向敏中權同知樞密院
事契丹侵河間康保裔死之庚申赦河北壬辰宋湜薨
甲午發大名益州叛軍推王均爲首庚子皇帝至自大

名二月癸亥王顯罷周瑩王繼英並知樞密院事王旦
同知院事三月戊寅朔日有食之己卯葬元德皇后夏
五月丁丑赦天下六月丁卯向敏中爲河北河東宣撫
大使冬十月雷有終復益州王均伏誅十一月壬午詔
曰在昔黃帝有下風之問伯禹有昌言之拜勤納規諫
以致雍和君臣叶心上下無壅永念于此予心惕然間
者深詔朝倫大闢言路而箝結相尚啓沃無聞豈朕之
誠信未孚邪將庶官狃於因循也今順攷舊規延進讜

議凡朕躬過失時政違尤教令之闕遺人情之壅閼並可條上勿或緘藏言近許者亦議優容文不工者許其直致固將親覽宜體至懷甲申張齊賢罷

四年春二月丙寅詔舉賢良方正直言極諫三月庚寅呂蒙正向敏中並同中書門下平章事辛卯王化基罷王旦參知政事馮拯陳堯叟同知樞密院事夏四月己未王欽若參知政事秋九月李繼遷陷清遠軍冬十一月王顯大破契丹于威虜軍

五年春二月癸酉詔曰比司帑廩者以羨剩爲勞蓋出納之際有所輕重此可責而不可獎也宜令有司嚴加戒勵無復使然三月李繼遷陷靈州守臣裴濟死之夏六月己卯周瑩罷秋七月甲午朔日有食之冬十月丁亥向敏中罷十一月壬寅合祭天地于圜丘大赦天下己酉皇子祐封信國公

六年夏四月契丹入寇王超逆戰于定州之望都王繼忠陷于陳卒己皇子祐薨秋七月癸丑兗王元傑薨九

月甲辰呂蒙正罷冬十二月甲子詔曰朕爲民司牧罔
敢逸豫冀聞闕政屢詔讜言而羣臣奏封罕有極陳得
失豈詢求之未至何循默以自持其令御史臺諭內外
官各上所見勿爲顧避李繼遷攻西涼戊寅赦天下

景德元年春正月丙戌朔大赦天下改元辛丑京師地
震丁未復震二月西涼潘羅支擊李繼遷繼遷中流矢
死三月己亥皇太后崩于萬安宮秋七月丙戌李沆薨
庚寅畢士安參知政事八月己未畢士安寇準並同中

書門下平章事王繼英樞密使馮拯陳堯叟並改僉書
樞密院事契丹入邊乙巳河決澶州閏月以王欽若判
天雄軍契丹將達蘭率衆侵威虜順安軍又與契丹主
及其國母侵定州駐于陽城淀以求和契丹侵岢嵐軍
冬十月王繼忠以契丹來請和命曹利用使于契丹丁
未皇弟元份留守京師十一月辛亥契丹侵瀛州又逼
冀州庚午皇帝親征王繼忠爲契丹請和契丹率衆犯
澶州射殺其將達蘭丙子辛北砦戊寅移御澶州北城

行宮曹利用還十二月庚辰朔日有食之契丹使韓玘來請和詔諸將按兵壬辰赦河北癸巳皇弟元份疾以王旦權留守甲午發澶州契丹使丁振來上誓書契丹出塞戊戌皇帝至自澶州

二年春正月庚戌朔大赦天下夏四月己亥詔河北諸州葺城池癸卯王欽若罷馮拯參知政事六月趙德明歸款秋七月甲子詔復賢良方正能直言極諫博通墳典達於教化才識兼茂明於體用武足安邊洞明韜略

運籌決勝軍謀宏遠才任邊寄堪爲將帥六科八月戊寅雍王元份薨冬十月乙酉畢士安薨十一月丁巳合祭天地于圜丘大赦天下皇弟元偓封寧王元偁舒王元儼廣陵郡王

三年春二月丁亥王繼英薨戊戌寇準罷王旦同中書門下平章事己亥王欽若陳堯叟並知樞密院事趙安仁參知政事韓崇訓馬知節僉書樞密院事冬十月葬明德皇后

四年春正月甲辰陳堯叟留守京師己未皇帝朝謁諸陵發京師丙寅奠獻安陵永昌永熙陵及諸后陵二月己巳幸西京辛卯發西京甲午次鄭州遣使謁周嵩慶二陵三月己亥皇帝至自西京夏四月辛巳皇后郭氏崩甲午詔曰權酤之利素有定規過求羨贏是縱倍克自今中外不得增課庶以息民五月丙申朔日有食之六月乙卯葬莊穆皇后秋七月宜州軍校陳進以宜州亂陷柳象州懷遠軍八月庚子韓崇訓罷冬十月曹利

用擊敗賊黨陳進伏誅乙卯詔曰拷掠之法素著科條
非理擅行茲謂慘酷諸道官司應有非法訊囚之具一
切毀棄

大中祥符元年春正月乙丑天書大中祥符三篇降于
左丞天闕之上戊辰大赦天下改元夏四月甲午詔以
十月有事于泰山王欽若趙安仁爲泰山封禪經度制
置使丙午作玉清昭應宮五月戊子詔貴戚進奉物勿
以銷金文繡爲飾六月乙未天書再降于泰山醴泉庚

成赦兗州辛亥羣臣上尊號曰崇文廣武儀天尊道寶
應章感聖明仁孝皇帝秋八月己丑上太祖太宗尊謚
九月庚申向敏中留守京師甲子皇帝奉天書告太廟
冬十月辛卯發京師辛亥享昊天上帝于泰山之圜壇
陳天書于左奉太祖太宗配命羣臣享五方帝諸神于
山下大赦天下丙辰次兗州十一月戊午幸曲阜進謁
文宣王廟加上文宣王曰玄聖文宣王丁丑皇帝至自
泰山壬午以正月三日爲天慶節甲申親享六室十二

月皇弟元儼封榮王

二年冬十月甲午詔天下置天慶觀十一月丙辰皇帝作文武七條賜文臣任轉運使以下至知縣武臣任將帥以下至巡檢者

三年春閏二月戊辰赦京畿秋八月詔以來年春有事于汾陰以陳堯叟爲祀汾陰經度制置使冬十一月陝州黃河清十二月又清向敏中留守京師

四年春正月丙申以六月六日天書再降日爲天貺節

丁酉皇帝奉天書發京師庚子至汜水辛丑望拜諸陵
二月辛酉皇帝詣睢上祀后土地祇奉太祖太宗配大
赦天下三月次西京丙申謁安陵永昌永熙元德皇后
陵夏四月皇帝至自汾陰皇弟元偓封相王五月乙未
詔曰峻極之岳神靈主焉其加上五嶽帝號秋七月壬
申詔兩浙福建荆湖廣南路諸州每歲丁錢四十五萬
四百千悉降之甲午馮拯罷八月乙巳河決通利軍

五年夏四月戊申向敏中同中書門下平章事三司言

民有販茶違法者許同居告上曰以利而壞風俗可乎
不許秋八月丙申朔日有食之九月戊子王欽若陳堯
叟並樞密使同平章事馬知節樞密副使丁謂參知政
事趙安仁罷冬十月戊午九天司命天尊降于延恩殿
諭以本人皇九天之一乃趙始祖再降爲黃帝後唐時
復降主趙氏之族己未大赦天下閏月己已上天尊聖
號曰聖祖上靈高道九天司命保生天尊大帝辛未謁
謝太廟壬申詔避聖祖名以七月一日爲先天節十月

二十四日爲降聖節乙亥上聖祖母懿號曰元天大聖
后又加上太廟六室尊謚丙子羣臣上尊號曰崇文廣
武感天尊帝應眞佑德上聖欽明仁孝皇帝十一月丙
申親祀玉皇于朝元殿以聖祖太祖太宗配十二月壬
申改謚孔子爲至聖文宣王丁亥以德妃劉氏爲皇后
六年春正月辛酉詔宗正寺以帝籍爲玉牒夏五月赦
東京建安軍以鑄玉皇聖祖太祖太宗尊像成故也秋
七月癸卯詔天下勿稅農器八月庚申詔以來春親謁

亳州太清宮辛酉以丁謂爲奉祀經度制置使庚午加上老子號曰太上老君混元上德皇帝冬十二月戊午朔日有食之丙寅寇準留守京師

七年春正月壬寅皇帝奉天書發京師己酉朝謁太清宮庚戌幸亳州謁聖祖殿乙卯次應天府丙辰詔曰應天府太祖興王之邦也其建南京作鴻慶宮二月辛酉皇帝至自亳州壬申恭謝天地于南郊大赦天下三月丁未皇子封慶國公夏四月丙子舒王元僊薨六月乙

亥王欽若陳堯叟馬知節罷寇準樞密使秋七月癸卯
王嗣宗曹利用並樞密副使九月辛卯上玉皇聖號曰
太上開天執符御曆含真體道玉皇大帝冬十二月
己未作元符觀

八年春正月壬午朔大赦天下夏四月壬戌寇準罷王
欽若陳堯叟復爲樞密使丙寅詔曰倉庾出納自今勿
得以羨餘爲吏課壬申榮王宮火五月庚子放宮人一
百八十四人丙午皇弟元儼降封端王詔宗室皇親及

外庭臣庶之家不得以銷金戔金金線之類爲衣服器
用六月己酉朔日有食之閏月己卯大赦天下秋七月
戊午王嗣宗罷冬十一月辛酉皇弟元儼封彭王十二
月辛卯皇子封壽春郡王

九年春正月丙辰張旻樞密副使夏五月景靈宮會靈
觀兗州景福宮太極觀成秋七月蝗八月丙戌陳堯叟
罷九月甲辰丁謂罷丙午陳彭年王曾張知白並參知
政事任中正樞密副使宗哥喃廝羅入寇曹瑋擊敗之

冬十一月乙卯詔改元

天禧元年春正月薦獻玉皇大帝于玉清昭應宮上
聖祖天尊大帝仙服于景靈宮辛亥恭謝天地于南郊
大赦天下以四月一日爲天祺節二月戊寅皇弟元偓
封徐王己亥陳彭年薨夏四月乙亥放聖祖金寶牌于
天下五月戊申王旦爲太尉侍中遇軍國重事不限時
日入預參決六月壬申赦西京秋七月丁巳王旦罷八
月庚午王欽若同中書門下平章事張旻罷戊寅免牛

金史卷四
稅九月癸卯王曾罷李迪參知政事馬知節知樞密院
事曹利用任中正周起並同知院事冬大雪

二年春二月丁卯皇子封昇王夏四月庚寅赦天下癸
卯馬知節罷作祥源觀五月壬戌詔曰民勤稼穡家有
儲峙所以備流行之災而末俗澆浮罕務蓄積歲或小
歉便至流亡豈教導之方未甚篤也今禾麥將稔令所
在長吏躬親勉諭無使復然甲子徐王元偓薨六月乙
未曹利用知樞密院事秋七月壬申赦天下八月甲辰

詔以皇子昇王爲皇太子大赦天下壬子皇弟元儼封通王冬十二月丙午張知白罷

三年春三月戊午朔日有食之是月朱能以天書降于乾祐山中夏六月甲午王欽若罷河決滑州戊戌寇準同中書門下平章事丁謂參知政事秋七月壬申羣臣上尊號曰體元御極感天尊道應真寶運文德立功上聖欽明仁孝皇帝八月丁亥大赦天下冬十一月乙卯詔曰自今犯酒麪銅鑰等條有死刑者去之己巳月重

輪辛巳合祭天地于圜丘大赦天下十二月辛卯皇弟
元儼封涇王曹利用丁謂並樞密使任中正周起並副
使

四年春正月乙丑曹瑋僉書樞密院事三月己卯向敏
中薨夏六月丙申寇準罷秋七月丙寅李迪同中書門
下平章事馮拯樞密使庚子丁謂同中書門下平章事
癸酉誅內侍周懷政八月乙酉任中正王曾並參知政
事錢惟演樞密副使九月丙辰周起曹瑋罷丁卯赦天

下冬十一月戊辰丁謂李迪罷已巳謂仍赴中書視事
馮拯同中書門下平章事庚午詔自今除軍國大事朕
自親決餘皆委皇太子同宰相樞密使等參議施行十
二月乙亥皇帝不豫

五年春正月癸巳赦天下丁酉張士遜樞密副使秋七
月甲戌朔日有食之

乾興元年春正月辛未朔改元二月庚子朔大赦天下
詔自今中外所上表咸去稱號羣臣請上尊號曰應天

尊道欽明仁孝皇帝從之庚戌皇帝不豫戊午皇帝崩于延慶殿聖壽五十五殯于殿之西階羣臣上尊謚曰文明章聖元孝皇帝廟號真宗冬十月己酉葬永定陵天聖二年加上尊謚曰文明武定章聖元孝皇帝慶歷七年再加上尊謚曰膺符稽古神功讓德文明武定章聖元孝皇帝

臣稱曰宋興承五季之餘天下得離兵革之苦至真宗之世太平之治洽如也咸平以來君明臣良家給人足

刑措不用契丹請和示以休息德明納款撫以恩信於是朝帝陵封岱宗祀汾睢謁亳社絕代曠典莫不具舉禮樂明備頌聲洋溢崇本報功以告神明千載一時豈不休哉噫守成之賢致治之盛周成康漢文景可以比德矣



東都事略卷四

欽定四庫全書

史部

東都事略卷

五至八

詳校官庶吉士臣何道沖

編修臣裴謙覆勘

覆校官編修臣曹城

校對官編修臣許兆椿

謄錄貢生臣王嘉稷

欽定四庫全書

東都事略卷五

宋王稱撰

本紀五

仁宗體天法道極功全德神文聖武睿哲明孝皇帝真宗第六子也母曰章懿皇后李氏嘗夢二日在天其一忽墜以裾承之自是有娠以大中祥符三年四月十四日生是日大雷震章獻明肅皇后以爲己子七年爲左衛上將軍封慶國公八年拜中正軍節度使兼侍中進

封壽春郡王天禧元年兼中書令二年爲建康軍節度使太保封昇王八月立爲皇太子仁宗容止莊重不妄言笑四年詔中書樞密院及諸司非大事並委皇太子資善堂裁處以聞乾興元年春二月戊午真宗崩奉遺制即皇帝位于匱前尊皇后曰皇太后以皇帝尚幼軍國事兼權取皇太后處分己未大赦天下丙寅丁謂以司徒馮拯以司空兼侍中皇叔元儼封定王三月乙酉作受命寶夏六月庚申誅內侍雷允恭癸亥丁謂貶任

中正罷秋七月辛未王曾同中書門下平章事呂夷簡
魯宗道並參知政事丙子錢惟演樞密使八月乙巳皇
帝皇太后初御承明殿垂簾決事九月己卯以天書從
葬永定陵冬十月己酉葬文明章聖元孝皇帝于永定
陵十一月丁卯朔錢惟演罷張知白樞密副使

天聖元年春正月丙寅朔改元秋七月辛巳放天下逋
欠八月丙午赦天下九月丙寅馮拯罷王欽若以司空
同中書門下平章事

二年春二月癸未皇太后詔宰臣曰吾受先帝顧託之深皇帝富于春秋助成正道用乂斯民期見抱孫之歡永遂含飴之樂此吾之志也更賴三事庶尹百工羣司勉悉乃心同底于道夏五月丁亥朔日有食之秋八月丙辰朔詔自今舉官已遷改而貪污者許元舉官以狀聞不以實者劾其罪冬十一月甲午加上真宗尊謚丁酉合祭天地于圜丘大赦天下羣臣上尊號曰聖文睿武仁明孝德皇帝上皇太后尊號曰應元崇德仁壽慈

聖皇太后乙巳立皇后郭氏

三年夏四月壬子朔詔恤刑獄冬十月辛酉晏殊樞密副使十一月戊申王欽若薨十二月張知白同中書門下平章事乙丑張耆樞密使

四年夏五月壬午詔曰國家勤卹黎庶必期無訟而生齒之繁犯者頗衆朕甚閔焉應天下大辟情理可憫及刑名疑慮者具案以聞有司無得舉駁閏月減江淮發運司歲漕止六百萬石六月建州劔州邵武軍大水庚

寅大雨震雷平地水數尺壞京城民舍河南府鄭州大水秋九月乙卯詔曰講學之廢久而執卷者不知經義非上之教導有失邪其令講官孫奭馮元舉京朝官博通經術者以名聞冬十月甲戌朔日有食之十二月丁亥皇帝白皇太后欲元日率百官先上皇太后壽然後受朝太后曰豈可爲吾而後元會之禮哉王曾奏曰陛下以孝奉母儀而太后以謙全國體請如太后令

五年春正月壬寅朔皇帝率百官上皇太后壽于會慶

殿朝于天安殿己未晏殊罷戊辰夏竦樞密副使三月
秦州地震夏五月癸亥楚王元佐薨冬十一月癸丑合
祭天地于圜丘大赦天下

六年春二月壬午張知白薨三月丙申朔日有食之壬
子張士遜同中書門下平章事姜遵范雍樞密副使辛
酉建太一宮夏四月甲申流星大如斗秋七月河北大
水九月遣近臣十七人巡行河北

七年春正月癸卯曹利用罷二月庚申朔魯宗道薨丙

寅張士遜罷呂夷簡同中書門下平章事夏竦薛奎參
知政事陳堯佐樞密副使三月癸未詔曰國家設制策
之科將博詢於鯁議有能規朕躬之過失陳宰相之闕
遺糾中外之姦回斥左右之朋比述未明之機事貢無
隱之密謀以至臺省之官阿私而罔上郡國之吏專恣
以濫刑或通受貨財潛行請託或恃憑權勢敢事貪殘
並許極言朕當親覽其令百官遇起居日轉對在外臣
僚亦許具實封以聞夏四月庚寅太赦天下六月丁未

玉清昭應宮災甲寅王曾罷秋八月丁亥朔日有食之
詔以天下職田租送官以數上三司均給之辛卯夏竦
樞密副使陳堯佐王曙並參知政事冬十月丙午京師
地震十一月癸亥皇帝率百官上皇太后壽于會慶殿
是歲皇叔元儼封鎮王

八年秋九月乙丑姜遵薨己巳趙禎樞密副使冬十月
丙申詔罷權池鹽地分初陝西京西京南路許解鹽餘
皆權之議者以輦運之役困軍民至是京西京北河東

京東路並聽以見錢金銀輸京師權貨務就池給鹽其
後商賈流通而官課損矣十一月戊辰合祭天地于圜
丘大赦天下

九年春二月癸巳詔曰天下吏給職田所以惠養廉節
也而貪汙之人並緣爲私侵漁細民滋以爲害比詔有
司皆從停罷如聞勤事之吏祿薄不足以自養朕甚愍
焉其復職田冬十月丙戌詔曰朕遵列聖之謀荷慈宸
之教于茲八年矣而措紳之間名節罔勵矜勞者掠美

以近名希進者行險以徼寵詆誣執政干撓有司分屏
翰者或奏請之靡厭主按察者或寬縱之爲得貪而無
耻姑務營私老而非材曾不知退繇廉耻之未飭致風
化之靡醇此豈朕之所望哉用稽彛訓申儆羣倫苟少
冒於官箴將自投於公憲布告遐邇體朕意焉

明道元年春二月庚戌張士遜同中書門下平章事丁
卯順容李氏爲宸妃是日薨秋七月乙酉王曙罷八月
庚子朔晏殊樞密副使丙午殊參知政事甲寅楊崇勲

樞密副使壬戌文德殿成是夜禁中火乙丑詔求直言
丁卯大赦天下冬十一月甲戌恭謝天地于天安殿遂
謁太廟大赦天下改元癸未皇叔元儼徙封孟王辛卯
封荆王十二月壬寅楊崇勲樞密使

二年春二月乙巳皇太后饗太廟羣臣上皇太后尊號
曰應元齊聖顯功崇德慈仁寶壽皇太后丁未皇帝祀
神農于壇乃就耕位執耜行籍田之禮三推有司請止
上曰朕將耕之終畝以勸天下之力農乃耕十二步而

止大赦天下羣臣上尊號曰睿聖文武體天法道仁明
孝德皇帝三月庚寅皇太后不豫大赦天下甲午皇太
后崩于寶德殿夏四月罷命婦進獻祈乞恩澤凡表奏
無得緣親戚投進禁中事有傳宣令有司實封覆奏內
批改官及與差遣未得即行委中書樞密院審取處分
天下毋得勅修寺觀聖節所進香合山儀並停上親政
中外大悅己未呂夷簡張耆罷李迪同中書門下平章
事夏竦陳堯佐范雍趙稹晏殊罷王隨參知政事李諮

樞密副使王德用僉書樞密院事五月癸酉詔曰大行
皇太后保佑冲人十有二年恩勤至矣而言者罔識大
體詆訐一時之事非所以慰朕孝思也其垂簾日詔命
中外毋輒以言上親攬政而言者多譏斥垂簾日事上
惡其持情近薄故禁之乙亥李諮以父憂起復六月甲
午朔日有食之秋七月戊子詔曰比年以來蝗旱作沴
郡國交奏日月相仍豈朕德之不明將天時之適爾風
夜循省咎實在予自今尊號去睿聖文武四字仍令中

外各直言極諫朕將親覽焉八月庚申以內藏錢百萬
賜三司初三司以用度不足告于上上曰國家禁錢本
無內外蓋以助經費也自是歲歉或調發則出內藏以
濟之冬十月丁酉葬莊獻明肅皇后于永定陵戊午張
士遜楊崇勲罷呂夷簡同中書門下平章事王曙樞密
使宋綬參知政事王德用蔡齊樞密副使十一月癸亥
朔薛奎罷十二月乙卯皇后郭氏廢丁巳詔改元

景祐元年夏閏六月甲子泗洲淮汴溢秋八月壬戌有

星孛於張翼癸亥王曙薨庚午王曾樞密使辛未以星
變大赦天下九月甲辰立皇后曹氏冬十月西戎寇邊
二年春二月戊辰李迪罷王曾同中書門下平章事王
隨李諮並知樞密院事王德用韓億同知院事蔡齊盛
度並參知政事夏四月庚午詔曰雅樂之作治道所基
郊丘宗廟之祠朝廷饗侑之禮人神和會茲實重焉爰
命有司攷正鍾律應中外臣僚暨州里儒學草澤博聞
之士能洞曉古今雅樂制作及音律得失灰琯測候之

法並許所在薦聞或自言官司將較試之五月甲申朔
詔曰朕恭惟太祖皇帝受天命建大業可謂有功矣二
聖繼統重熙累洽可謂有德矣其令禮官稽按典籍辨
崇配之序定二祧之位中書門下審加詳閱以稱朕心
於是禮院言我太祖經綸草昧遂有天下功宜爲帝者
祖太宗勤勞制作真宗功成治定德宜爲帝者宗三廟
並萬世不毀至於升侑上帝請自今以太祖爲定配二
宗爲迭配將來皇帝親祠請以三聖並侑中書門下奏

請如禮官議詔恭依庚寅禁銷金縷金之飾秋七月戊戌羣臣上尊號曰景祐體天法道欽文聰武聖神孝德皇帝九月新樂成己酉建睦親宅廣親宅冬十一月戊子廢后郭氏薨乙未合祭天地于圜丘大赦天下

三年秋七月初置大宗正司八月乙酉詔天下士庶之家凡室宇非邸第樓閣無得四輔作闕八非品官無得起門屋非宮室寺觀無得綵繪棟宇及間朱梁柱器用無得純金及表裏用朱非三品以上及宗室戚里之家

無得金稜器及用玳瑁器非命婦無得金爲首飾及真珠裝綴首飾衣服凡帟幕架帕床裙無得用純錦民間無得乘檐子其用兜子者所昇無得過二人非五品以上無得乘鬧裝銀鞍其乘金塗銀鞦條子促結鞍轡自文武升朝以上聽達者物主工匠並以違制論過百日而不變毀者坐之冬十一月戊寅保慶太后楊氏薨十二月李諮薨王德用知樞密院事章得象同知院事四年夏四月甲子呂夷簡王曾宋綬蔡齊罷王隨陳堯

佐並同中書門下平章事盛度知樞密院事韓億程琳
石中立並參知政事王駿同知樞密院事六月乙亥杭
州大風雨秋七月戊申有星數百西南流冬十二月忻
代并三州地震

寶元元年春正月甲辰麟府州及陝西大雨雹三月戊
戌王隨陳堯佐韓億石中立罷張士遜章得象並同中
書門下平章事王駿李若谷並參知政事王博文陳執
中並同知樞密院事夏四月辛未王博文薨乙亥張觀

同知樞密院事秋七月丙辰大臣以將郊上尊號上曰
唐穆宗謂彊我懿號不若使我爲有道之君加我虛尊
不若居我於無過之地朕常愛斯言羣臣請不已上刊
英睿二字而受之於是上尊號曰寶元體天法道欽文
聰武聖神孝德皇帝冬十一月庚戌合祭天地于圜丘
大赦天下十二月甲子京師地震趙元昊反僭號于夏
州

二年夏五月壬子王德用罷夏守贇同知樞密院事六

月壬午削奪元昊在身官爵仍除屬籍有能生擒及斬
首來獻者與除定難軍節度使秋八月甲戌皇子生十
一月戊子出禁中真珠估緡三十萬賜三司上曰此無
用之物不欲捐棄不若散之民間收其直助給邊儲亦
可紓吾民之力也丁酉盛度程琳罷壬寅王駿知樞密
院事宋庠參知政事十二月夏人犯保安軍狄青敗之
康定元年春正月庚戌日有食之乙亥元昊圍延州劉
平石元孫與賊戰于三川口王師敗績平死之二月丙

午赦延州保安軍改元夏守贊罷三月戊寅王駿陳執
中張觀罷宋綬晏殊並知樞密院事王貽永同知院事
夏四月丙午誅內侍黃德和五月壬戌張士遜以太傅
致仕呂夷簡同中書門下平章事六月乙亥夏守贊同
知樞密院事秋八月戊午夏守贊罷杜衍同知樞密院
事九月壬午李若谷罷宋綬晁宗慤參知政事鄭戩同
知樞密院事戊辰王師失利于三川砦晏殊樞密使王
貽永鄭戩杜衍並改副使辛未范仲淹以任福等出師

攻賊白豹城破之冬十一月范仲淹以葛懷敏出師出
歸娘谷與夏人戰敗之十二月宋綬薨

東都事略卷五

欽定四庫全書

東都事略卷六

宋王稱撰

本紀六

慶歷元年春二月辛卯韓琦以任福等與賊戰于好水
川任福及耿傅桑懌王珪武英死之己亥皇子昞薨夏
五月乙丑皇子昉薨辛未宋庠鄭戩罷王舉正參知政
事任中師任布並樞密副使秋八月元昊寇麟府二州
戊子元昊陷豐州守臣王餘慶死之乙未毀潼關九月

乙亥詔天下立義倉冬十一月丙寅合祭天地于圜丘
大赦天下改元

二年春正月契丹聚兵幽薊三月丁巳杜衍宣撫河東
辛酉晁宗慤罷己巳契丹遣蕭英劉六符來求關南地
夏四月庚寅命富弼使于契丹五月丁巳陞大名府爲
北京戊寅詔自中宮已下並不得衣銷金縷金蹙金陷
金明金泥金楞金背金欄金盤金織金金線撚金等秋
七月丙午任布罷戊午呂夷簡判樞密院章得象兼樞

密使富弼還癸亥再使契丹九月丙午呂夷簡改兼樞
密使乙丑契丹遣邪律仁先劉六符來修好甲午葛懷
敏與元昊戰于定川砦敗績冬元昊求納款

三年春正月辛未封皇子曦爲鄧王是日薨癸巳延州
言元昊稱夏國遣賀從勗來納款二月遣梁適使于契
丹三月戊子呂夷簡守司空軍國大事與中書門下樞
密院同議以聞晏殊同中書門下平章事兼樞密使賈
昌朝參知政事夏四月癸卯以邵良佐使夏州甲辰韓

琦范仲淹並樞密副使乙巳杜衍樞密使夏竦罷甲子
呂夷簡罷與議軍國大事五月乙卯朔日有食之乙亥
忻州地震丁亥置武學戊子雨上曰天久不雨將害民
田朕每焚鄉上禱於天昨寢殿中間雷遽起冠帶露立
殿庭須臾雨霑衣或冀枯苗尚可救秋七月甲子王舉
正罷甲戌任中師宣撫河東范仲淹宣撫陝西元昊遣
使來八月丁未范仲淹參知政事富弼樞密副使癸丑
以韓琦宣撫陝西九月乙亥任中師罷冬十月詔韓琦

等曰比以中外人望故決意用卿等今琦暫往陝西仲淹弼宜與宰相得象盡心國事毋或有所顧避其當世急務有可建明者悉爲朕陳之壬寅詔曰虞典考三載之績周官計羣吏之治攷課則有限年之制入官則有循資之格然非褒沮善惡則不激厲非甄別流品則不憤發特頒程式以茂官箴自今京朝官有舉官五人方得磨勘外郎至卿監亦如之其舉者不足增二年甲子鄭戩奏城水洛冬十一月丙寅上清宮災庚寅韓琦使

還

四年春正月乙亥荆王元儼薨丙子宜州歐希範叛破
環州癸未詔自今見任兩府及兩省已上官不得陳乞
子弟親戚爲館職其進士及第三人已上者一任回無
過犯須進經術十卷下兩制看詳可否召試入優等方
得除館職或闕人即以嘗有兩府臣僚二人或大兩省
已上三人保薦者並令進文字然後補試之丁亥詔曰
周禮大司樂掌學政以六藝教國子漢制光祿勳典任

藉以四行察三省郎今蔭法之所原古典刑之是憲夫
冢嗣先錄以篤爲後之體支子限年以明入官之重非
惟爲國造士是乃爲臣立家咨尔百僚體朕茲意壬辰
詔曰廉素者士之常而富貴者是人之所欲也昔先帝
詔復公田合王制班祿之差得聖人養賢之道然郡縣
受地有無不齊其議所以均之三月壬申詔曰夫儒者
通乎天地人之理而兼明古今治亂之原可謂博矣然
學者不得騁其說而有司務先聲病章句以牽拘之則

吾豪雋奇偉之士何以奮焉士有明純樸茂之美而無
教學養成之法其飭身勵節者使與不肖之人雜而並
進則夫懿德敏行之賢何以見焉今朕建學興善以尊
子大夫之行而更革弊法以盡學者之材其於教育之
方勤亦至矣有司其務嚴訓導精察舉以稱朕意學者
其思進德修業而無失其時於是諸路州府軍監並立
學如修學者多及二百人以上許更置縣學夏四月令
杜杞往平歐希範五月庚午忻州地震丙戌元昊遣使

來稱臣更名曩霄秋七月水洛城成庚戌范仲淹宣撫
陝西河東癸未契丹遣邪律元衡來告舉兵攻夏州八
月富弼宣撫河北戊戌保州軍亂九月辛卯田況以李
昭亮平保州庚午晏殊罷甲申杜衍同中書門下平章
事兼樞密使賈昌朝樞密使陳執中參知政事冬十一
月壬寅改謚真宗五后尊謚壬午合祭天地于圜丘大
赦天下十二月乙未封曩霄爲夏國王

五年春正月乙酉范仲淹富弼罷丙戌杜衍罷賈昌朝

同中書門下平章事兼樞密使王貽永樞密使宋庠參
知政事吳育龐籍樞密副使二月辛卯詔曰比者京朝
官須因人保任始得遷官朕念廉士或不能以自進也
其罷之三月己未詔太宗正寺曰朕思古之人君莫不
厚親戚以輔王室始邦家而化天下宋興八十餘載宗
室蕃衍宜令睦親宅諸院教授官課經典文詞以聞辛
酉韓琦罷甲子杜杞誘歐希範醢之甲申赦陝西戊申
章得象罷陳執中同中書門下平章事兼樞密使庚戌

吳育參知政事丁度樞密副使秋七月甲子廣州地震
乙卯荆南岳州地震冬十月乙卯契丹使來獻捷辛酉
升祔章獻章懿于真宗廟室大赦天下庚戌宰相罷兼
樞密使

六年春二月戊寅青州地震三月辛巳朔日有食之庚
寅登州地震五月甲申雨雹地震秋八月癸酉吳育樞
密副使丁度參知政事九月丁卯登州地震上曰山東
連年地震宜防未然之變其下登州嚴武備

七年春二月己未賈昌朝吳育罷夏竦樞密使文彥博
樞密副使丁酉文彥博參知政事高若訥樞密副使冬
十月乙丑河陽許州地震十一月乙未加上真宗尊謚
戊戌合祭天地于圜丘大赦天下王則反于貝州

八年春正月丁丑文彥博宣撫河北閏月辛丑文彥博
平貝州甲辰赦河北戊申文彥博同中書門下平章事
甲子衛士作亂于禁中丙午王則伏誅夏四月壬辰丁
度罷明鎬參知政事五月夏竦罷宋庠樞密使龐籍參

知政事六月甲午明鎬薨河北大水冬十二月乙丑朔
詔改元

皇祐元年春正月甲午朔日有食之二月消井蠻寇邊
秋八月壬戌陳執中罷宋庠同中書門下平章事龐籍
樞密使高若訥參知政事梁適樞密副使九月廣源州
蠻寇邕州

二年春三月戊子朔詔以九月有事于明堂夏四月乙
丑詔曰明堂之禮前代並用鄭康成王肅義說兼祭昊

天上帝已爲變禮國朝自祖宗以來三歲一親郊即徧祭天地而百神靡不從祀明堂正當三歲親郊之期而禮官所定上祭昊天五帝而不及地祇又配坐不及祖宗未合三朝之制今移郊爲大享蓋爲民祈福若祭天而不祭地又祖宗不得徧配於禮未安其將來親祀明堂宜合祭昊天皇地祇奉太祖太宗真宗並配而五帝神州地祇亦親獻日月河海諸神悉如圜丘從祀之數以稱朕躬事天地祖宗神靈之意五月廣源州蠻遁秋

九月辛亥大享明堂大赦天下冬十一月秀州地震
三年春三月庚申宋庠罷夏五月眉州進瑞麥圖上曰
朕嘗禁四方瑞物今則西川麥秀可謂真瑞矣其賜田
夫束帛以敦勸之六月無爲軍獻芝草上曰朕以豐年
爲瑞賢臣爲寶至於草木蟲魚之異焉足尚哉仍戒州
郡自今無得以聞秋七月丙辰詔曰兗州仙源縣自國
朝以來孔子子孫知縣事使奉承廟祀近歲廢而不行
非所以尊先聖也自今宜以孔子子孫知縣事冬十月

作隆儒殿庚子文彥博罷龐籍同中書門下平章事高若訥樞密使梁適參知政事王堯臣樞密副使

四年夏四月廣源州蠻儂智高反五月乙巳儂智高陷邕州司戶參軍孔宗旦死之癸丑儂智高陷橫州丙辰陷貴州庚申陷龔州辛酉陷藤州又陷梧州又陷封州守臣曹覲死之壬戌陷康州守臣趙師旦死之癸亥儂智高陷端州丙寅儂智高圍廣州六月丁亥狄青樞密副使秋七月壬戌智高去九月庚午命狄青討儂智高

冬十月丁丑儂智高陷賓州甲申智高入據邕州十一月壬寅朔日有食之

五年春正月戊午狄青敗儂智高于歸仁鋪智高遁二月甲申赦廣南三月甲子奉太祖御容赴滁州太宗御容赴井州真宗御容赴澶州立原廟夏四月壬申狄青還五月乙巳狄青樞密使高若訥罷丁未孫沔樞密副使六月己亥奏新樂秋閏七月壬申龐籍罷陳執中梁適並同中書門下平章事劉沆參知政事冬十一月己

已合祭天地于圜丘大赦天下

至和元年春正月癸酉貴妃張氏薨三月己巳王貽永
孫沔罷王德用樞密使田況副使庚申改元夏四月甲
申朔日有食之秋七月丁卯程戡參知政事戊辰梁適
罷八月丙午劉沆同中書門下平章事冬十月辛卯朔
太白晝見

二年春三月丙子詔封孔子後爲衍聖公夏四月己亥
契丹遣使以其主繪像來獻且求御容六月陳執中罷

戊申文彥博富弼並同中書門下平章事冬十二月庚戌太白晝見

嘉祐元年春正月庚申皇帝不豫甲子大赦天下二月甲辰御延和殿閏三月癸未王堯臣參知政事程戡樞密副使夏四月河北大水壬子河決商胡六月乙亥太社太稷壇壞己卯詔曰廼者淫雨降災大水爲沴兩河之間決溢爲患皆朕不德天意所譴其令中外實封言時政闕失毋有所諱秋七月彗出紫微垣八月庚戌朔

日有食之癸亥狄青罷韓琦樞密使九月辛卯恭謝天地于大慶殿大赦天下改元冬十一月辛巳王德用罷賈昌朝樞密使十二月戊申朔劉沆罷曾公亮參知政事

二年春三月丁丑雄霸州地震三月己未契丹遣邪律防來求御容秋八月丁卯天下置廣惠倉九月契丹遣蕭扈來求御容冬十月乙巳以張昇奉御容使于契丹三年夏六月丙午文彥博罷韓琦同中書門下平章事

賈昌朝罷宋庠田況樞密使張昇副使乙亥交趾獻異
獸秋八月己未王堯臣薨冬閏十二月丁丑詔曰朕惟
國之取士士之待舉皆不可以曠久亦不可以泛沔沔
則課校不審久則賢雋或滯用間歲之期而約貢舉之
數以精其選著爲定法申敕有司而高下之往嘗不次
而用若猶例進終至溢負故增其任以舉其材緩其進
以圖其效此天下之士所同欲而朕果於必行也若夫
高材異行施於有政忠謨嘉猷見諸行事已試之狀爲

衆所推必有非常之恩以示至公之道咨尔多士體朕意焉

四年春正月丙申朔日有食之三月辛卯詔凡宮室之制器用之度冠服之章妾媵之數其令中外各遵守前後詔條違者御史臺及開封府糾察以聞諸路即委轉運使提點刑獄及長吏如詔施行夏四月癸酉詔曰先王推紹天之序尚尊賢之義褒其後嗣賓以殊禮豈非聖人稽古報功之大典哉國家受命之元繼周而王雖

民靈欣戴歷數允集而虞賓將遜德美丕顯頃者推原本始褻及支庶恩則厚矣而義未稱將上采姚姒之舊略循周漢之典詳其世嫡優以公爵異其仕進之路申以土田之錫俾寢廟有奉庶幾乎春秋通三統之義厚先代之制矣其以柴氏最長一人封崇義公與河南鄭州差遣給公田十頃以奉周祀至知州資叙即別與差遣却取以次近親人襲爵永爲定式五月丙辰田況罷六月辛亥放宮女二百一十四人冬十月癸酉祫祭于

太廟大赦天下

五年夏四月癸未程戡罷孫抃樞密副使五月京師地震六月乙丑詔曰朕聞前代之稱治者君臣同心上下輯睦人知禮義之節俗無激訐之風何其德之盛也朕雖弗敏切嘗慕焉自今臣僚如有輒上封章告人罪及以赦前事言者並當評劾之言事之臣雖許風聞宜務大體如事關朝政無憚極論自餘小過細故勿須察舉秋七月庚戌詔曰夫和平醇一之政行則民休美之氣

應險刻媿薄之路啓則民戚慘之變生蓋風化之感天
下其猶影響之相從也御史執法嘗爲朕言宜深詔執
事以遏浮競之風其令中書門下務采端厚忠實可以
表厲風俗之士並進于朝以啓迪朕心其詭激辨巧敢
涉朋比之迹者必行放棄之罰庶幾朝廷清明百異消
弭以起治平咨尔攸司其服朕命冬十一月辛丑宋庠
罷曾公亮樞密使張昇孫朴參知政事歐陽脩陳升之
趙槩並樞密副使

六年春三月己亥富弼以母喪罷夏四月庚辰陳升之
罷包拯樞密副使六月壬子朔日有食之秋七月癸巳
詔曰朕惟善治之主以天下耳目爲視聽而不自任其
聰明耳目之官今臺諫之任也夫以四海之廣萬事之
衆臺官數人不能以周知固將詢及士大夫而其間傾
邪險害之徒不惟朝廷義理所在謂職在言責執必施
行輒徇己之愛憎倚依形似扇造語言以中善良豈朕
所以圖治之意哉昔夏后氏之時官師相規漢之公卿

耻言人過今吾士大夫乃違古人之守蹈薄俗之爲日
益之流漫不知止甚無謂也其令中書門下開做百工
務行敦實閏八月庚子曾公亮同中書門下平章事張
昇樞密使歐陽脩參知政事胡宿樞密副使冬十月壬
辰詔以皇姪起復知宗正寺

七年春正月乙亥詔自今南郊以太祖皇帝定配三月
乙卯孫抃罷趙槩參知政事吳奎樞密副使夏五月庚
午包拯薨秋八月己卯詔曰人道親親王者之所先務

也蓋二帝之隆治由斯出朕甚慕之右衛大將軍岳州團練使某皇兄濮安懿王之子而朕之猶子也少鞠于宮中而聰智仁賢見於夙成向者選於宗子近藉命以治宗正之事使者數至其第乃崇執謙退久不受命朕默然有嘉焉朕承先帝遺緒奉承聖業罔敢失墜夫立愛之道自親者始固可以厚天下之風而上以嚴夫宗廟也其以爲皇子九月辛亥大享明堂大赦天下

八年春二月癸未皇帝不豫甲申赦天下三月辛未皇

帝崩于福寧殿聖壽五十四甲午殯于殿之西階羣臣
上尊謚曰神文聖武明孝皇帝廟號仁宗冬十月甲午
葬永昭陵元豐六年加上尊謚曰體天法道極功全德
神文聖武睿哲明孝皇帝

臣稱曰神文皇帝即位四十二年恢廓有聖度以大公
至正臨御不爲喜怒愛憎之所遷尊敬大臣容受直諫
其於宮室苑囿無所興作三司請以玉清舊地爲御苑
上曰吾奉先帝苑囿猶謂其廣何以苑爲其事天地宗

廟則齊粟不自勝或遇時變必跣足露立致禱於庭退則靜思所以致變者所幸張貴妃每責以正禮見其以珠玉爲飾則却而不視帷帶衾裯多施以繒絕元昊不臣懷以文德契丹渝盟敦守大信專務恭儉以德化民天下大辟有疑而情可閔者皆令上讞之所活歲以千數吏有失入死者則終身不用嘗曰朕未嘗詈人以死況敢濫刑罰乎是以四海之內舉熙熙然至於昆蟲草木各安其生又能傳政賢明克昌景祚烏虜仁哉

東都事略卷六